

四庫全書

集部

欽定四庫全書

文恭集卷十六

宋 胡宿 撰

外制

富弼可資政殿大學士依前給事中制

敕朕設別殿之職寵名儒之賢資其學優居乃詢于道
術倚其名重出則殿于翰垣惟吾體貌之臣適寄股肱
之郡宜疇功次益峻儀刑以爾具官某履正蹈方秉文

經武才周通于治體識迎照于幾先臯復賢科首躋德
舉籍甚朝廷之望居然廊廟之姿直質弗流謹言罔伏
殊疆出對挾無所憚之心大節猝臨有不可奪之色高
其忠力嘉乃謀謨擢亞內樞屢籌前箸愍勞久職歷寄
二藩曠言表海之邦號曰東秦之重教條班錄恩信施
行流傭自歸苛慝不作厥勞甚茂乃曠方深忽覽來章
姑求便郡深惟舒緩之俗方資控帶之才況德刑已孚
難驟移于守相而土風可樂足奉侍于慈親臯進貳于

禮卿復條陳于讓牘雖高已節終鬱朕心是用褒進大名申昭異數斯協至公之典以將東顧之懷少煩撫臨益在綏靖惟當懋勉以亮倚毗

楊察可龍圖閣學士歐陽修可龍圖閣直學士制
敕思文先朝游心往籍因層構之建設近職之華所以寵名儒訪治道我圖俊舊之望時惟鯁亮之姿差進禁
聯胥協公議具官楊某精白博洽端粹正方擢在禁林
復典謨而歸厚置之憲席處論議而不阿具官歐陽某

識遠才長文高行潔篤于信道不讀非聖之書忠于本
朝屢條當世之務並膺左右之選歷宣內外之勞峻節
弗渝清議彌勝用進秘圖之拜且光舊物之還旌乃名
臣敷于茂典爾身在外朕心弗忘嘉其來忠勿懲前事
施昌言可龍圖閣直學士制

敕國家藏錄秘文興峙宏構竝建禁職參寵美才用優
承學之名必取高時之彥矧鴻都待制之久兼外臺將
漕之煩積其成勞進于近著具官某思理通敏風業宏

深早宣績于本朝，迨升名于內閣，歷更邊部之任，洵持
漕節之行，董淮海之轉輸，濟京師之支度，仍歲勞止，厥
績茂焉。有嘉經畫之明用，陟禁嚴之等品，儀滋峻，恩數
昭升。尚繫膚敏之才，仍寄劇煩之職，就祇茂渥，勉績前
勞。

丁度可兵部侍郎張觀可尚書左丞制

敕朕圖政弼之，舊嘉老成之人，進退無于間言，出處全
乎美節，功庸前懋，朝野式瞻，特升爵秩之榮，益示儀刑。

之峻具官丁某志經道德性合誠明典冊擅乎辭宗風
業推于時匠具官張某材含厚棟體合大圭德好是民
彝仁以為己任竝歷更衆職宣暢本朝承詔旨于鑿坡
備勸講于帷幄匪惟授道多所納忠資其器略之賢寘
在樞鈞之地夙夜勞止功效炳然及解去于繁機用優
崇于禁職竝延升于別殿或倚任于輔藩時望益隆朕
心所簡不有殊典曷寵雋臣天轄之崇維正于八座夏
卿之貳典幹于七兵竝用褒優益彰峻重當體尚賢之

意惟勤進律之恩時我舊人豈煩多訓

禮部侍郎王淑可起復舊官制

敕具官某喪雖至隆禮有權奪閔氏孔門之高弟起而
服戎方進漢家之名儒除以視事蓋敦先于公義難取
究于私恩以爾文號辭宗學為祭酒善朝廷之大冊識
臺閣之舊章秘殿入聯備咨詢于政體經惟參侍倚勸
講于朕躬遽嬰陟岵之哀越在倚廬之制衰羸卒哭焦
毀過人自解去于近班實想聞于竒論用復禁嚴之綴

當明挹仰之懷弭痛茹荼從宜腰經尚修職業之舊勉
移忠孝之圖往服朝規無徇己志

向傅師可光祿少卿制

敕賞以申信治體所先恩不遺功勞臣用勸具官某才
志强濟行義純篤資扶陽之世德達仲由之政事劇煩
參試明練著稱日者京左之翰將值朔陞之荒蔽而能
度尺一之命體公上之急駟車轉餉流馬繁興糧道有
裨績用可紀賞許再期而遷秩適以少列而守藩爾勞

居多朕言不食夙期且及襄效用甄就進貳于內卿仍
宣條于歧下官儀亞河海之重故事掌宮掖之嚴往服
寵優勉思云補

呂士龍可衛尉少卿制

敕均二蜀之雄通為襟要亢一方之任舉屬才明惟臨
遣之著恩宜褒嘉之進典具官某器資詳敏性業淑均
早濟美于德門又潛華于郎省按外臺之計職風政以
修佐司會之版征事條乃舉屬梓潼之缺守控梁益以

須能將寄遠人之和無踰久吏之敏列御居棘路之重
衛尉掌門禁之嚴用峻官儀且光藩綬勉著肅清之最
益昭毗倚之懷

陳宗元可司農少卿制

敕某漢制二千石治有異迹或就增爵秩或入為公卿
所以詳試治民褒勸循吏以爾公力幹舉政事練更比
經莅任之方抑推資望之舊中臺久任右蜀上計灼存
底績之效舉合陟書之條不有褒息曷勸勤吏升亞列

卿之秩往司庶士之生茲為稷官尚委藩祭勉致庇民之效務揚守土之風鎮率吾恩懋承而職

張太沖可司農少卿制

敕某稷為大官扈實農正沿置九卿之副濟成三務之宜匪有積勤疇亞尊秩以爾賦外服之政比更列郡正中臺之秩數遷右曹所至則條教頗修視成則閭閻可紀超從司駕進貳大農已脫郎署之潛勿輕軍壁之小益當懋勉無忝褒嘉

韓絳可三司戶部判官制

敕某四方計書悉上會府九咳經入分領官曹必擇僚
職之良參幹土圖之掌以爾格量方厚才章典蔚善繼
名門之韻高取俊等之科置在道山試以都府亶無逋
事沛有餘力適資游刃之效復委左民之煩土均斂收
邦賦根本非如末利而已抑亦大計賴焉慎簡乃才往
踐厥位

楊敞可三司戶部判官依前直史館制

敕財府之煩分條于計職地官之屬參校于版征必賴
器能以濟事典具官某謙退不伐深博有謀忠孝自將
歷險夷而不改文武更用當劇易而靡辭久宣領服之
勞實靖邊隅之警比資術學之力擢參文史之筵屬司
會之曠僚賴時髦之濟務廣中外之更試成久大之蘊
崇滋懋乃誠勿替于素

王罕可充戶部判官制

敕某司會為府總集計文地官有聯參制斂法協司泉

賦咨擇雋髦以爾莊重弗流開敏胥濟早階門業之勝
亟踐朝闈之華居官不煩去輒見愛按章所至多著平
反蔚有循吏之風播厥輿人之頌攝居才局倚辦詔求
自以避親之嫌形于補外之請主計之請有薦選衆之
議亦同宜真領于版圖往敷宣于風力毋廢朕命益懋
乃官

趙及可尚書左司郎中制

敕漢家更試之法皆攷治功唐制侍從之勞咸著最令

惟時延閣之產佐我列藩之雄奏計甚優推賞宜渥具
官某恬能持正介不害通屢有辭職之高稔聞行己之
美鄰圖澹退就擢秘嚴資儒者之多聞俾叅持橐賴吏
師之兼敏尚委臨州居多愛利之風洽著休嘉之績潛
郎署而且久質官簿而當遷超從劇部之前升冠都司
之右秩惟峻重恩在褒嘉尚圖滿課之成庸對寵章之
懋

何知至可度支郎中制

敕其朕總馭官師博研行義嘉乃沖恬之德異于躁進
之風特越常均用敷褒典以爾率修士操究洽吏文早
懷膚敏之才亟踐雋良之選進升位著更試政條治財
府之煩未嘗遺力任計臺之劇彌復竭精在績效以章
明知性懷之澹退官逸久滯朝論僉喻履尚可嘉恩章
宜及中臺支度特正于名郎外部將輸尚繫于大使就
服褒華之命益宣清恪之誠

張揆可兵部郎中制

敕朕開邇英之講延稽古之流曠言進讀之臣久勞侍
從之事且優學力用峻官儀既以懋功亦惟重道某深
中篤行強識博聞詢事攷言早延升于內閣執經摘句
亦參侍于講帷蔚有通儒之稱雅著素絲之節襄嘉有
典陟恪為勞超叙七兵之華兼妙一臺之選尚緊近職
勿替納忠

張勗可兵部郎中制

敕某朕日者既祀明堂還御層觀因祖宗配侑之重與

天人交感之符乃推曲恩泛澤庶位擢爾以秋官之屬
委爾以漕職之煩雖新秩已遷而舊課未陟賞宜從重
勞則不遺況爾承相闕孝謹之風有書林清介之望亦
已久次何愛一官夏卿首曹中臺妙選併伸褒寵益在
欽祇

周湛可刑部郎中制

敕某朕攷內外吏治之實合前後官籍之勞率計閏成
差覆秩次用孚恩格茲謂彝章以爾系承汝穎之餘奮

繇漢沔之秀強計通于墳策精力究于事經比典漕于
賦車再部煩于財府幹用肅給最效著明升自秋臺之
聯仍從左戶之掌坐本曹而則廢領他部而有來往虔
朕恩勉修而職

趙良規可刑部郎中制

敕某朕遠採漢官設刺舉之使叅用唐制攷將漕之最
以爾濟名門之美預冊府之游中校典圖有辯章訂正
之益外宣條教著監司按察之勞賦興衍增方輸錯出

書林之次亦已久秋臺之秩用以遷進掌邦刑增峻使
範尚倚臨于外計勉成績于前勞

廖詢可都官郎中馮振可都官員外郎制

敕某等朕設課吏之格較比民之績申唐虞之簡舊去
漢魏之煩密均用一閔叅比衆功爾等體行清修風力
強濟自服王官之序屢試吏資之能分握符書臨長藩
服上計文而可紀應攷法以當遷宜正秋臺之聯進丞
郎省之務取稱懋官之典勉修良翰之風

鄭有章可比部郎中制

敕某朕以二蜀之地介在坤隅守吏有勞計年未滿聽先期驛上就增厥秩所以優遠吏恤西人也爾以風政之敏兼操行之修數領郡章今握州契著惠和之顯迹應攷課之成法惟秋聯之屬有比計之勾華于臺選寵示官成尚祇擢敘之恩無廢操修之志

劉立德可屯田郎中郭輔治可兵部員外郎制

敕朕大比庶工之治通視一閏之成計勞以遷在法惟

允以爾立德精明肅給吏文有餘以爾輔治清修謹質
士範無闕竝絲俊茂之選咸著休令之名至于握守符
持漕節宣我勤約之詔通為按察之官校課既優陟典
奚愛叙正墾田之秩稍進外兵之員胥獎成勞咸服休
命

闕詠可屯田郎中趙秉可職方員外郎制

敕某等夫治以得人為本而守長尤難官以稱職為賢
而名實須允我疇吏伐第進省曹胥獲美才咸進褒典

以爾詠性度閒遠履尚清修以爾秉識致疏通志用開
敏率自雋良之舊屢試劇煩之能進服臺聯外握符寄
虔我典刑之守濟于文雅之風或海沂以康賴堤閣之
利或徼外無撓濟遠夷之安列上年庸綏于朝聽正以
壑屯之秩職諸方貢之宜竝號名郎且旌良翰益樹終
更之課勿忘甄陟之恩

章參可屯田郎中趙永裕張肅竝可屯田員外郎

制

敕某等孝宣之治信賞而衆職理京房有言舉功而萬
化成政平吏良繇此物也朕率由舊典詳試庶工褒勸
勤庸以風內外以爾參行義深篤以爾肅風節清修以
爾永裕出舊德之門有名駒之質竝奮由士彥而稔服
朝聯典城臨民莅官行政節以廉著治用最聞列上年
庸胥膺攷法中臺之選起草為華右曹之煩墾田居劇
或進正員之重或峻副郎之選竝寵清流茲為茂典益
圖敏政庸對陟恩

職方員外郎董公產可屯田郎中比部員外郎馬
中庸可駕部員外郎屯田員外郎黎持正可都官
員外郎國子博士司卞盛和仲竝可虞部員外郎
太子中舍人張璿可殿中丞制

敕具官某設官以等則衆職舉有勞者進則羣臣勸歷
古為制茲道實先以爾服在朝聯夙推幹裕歲月之效
甫臨比最之期閣閱之資亦應叙遷之典遞增美秩用
獎久勤益念修方以圖來效

樂許國可水部郎中韓儼可都官員外郎葛禧可
國子博士嚴慶孫劉世昭竝可殿中丞制

敕某等夫堯之命官咸試以職漢之進更皆更治民績
用有成實行不謬以爾等或自致榮級或食其舊德率
用力官之敏進服班朝之聯外賦政經分幹事局悉上
計年之最來援攷課之法稽叅無缺旌陟乃宜叙正司
川之名稍遷都隸之局成均典教中盾為丞竝疏褒勸
之恩尚勵端廉之操

劉宏可三司檢法官制

敕某夫士之秀者節亦清馬奉壽母以孝聞參賓籌而
名劬朕以會計之府事劇訟繁傳致爰書屬在能吏會
法官之來代命銓部以選充齋伐來聞便與廷見更試
甚敏操決稱平俾居憲局之真益究刑章之習



文恭集卷十六

欽定四庫全書

集部

文恭集卷十七

詳校官侍講臣王燕緒

檢討臣何思鈞覆勘

總校官原任中允臣王燕緒

校對官編修臣于鼎

謄錄監生臣章玉植

欽定四庫全書

文恭集卷十七

宋 胡宿 撰

外制

高若訥可特授金紫光祿大夫行尚書戶部侍郎
依前參知政事加上護軍進封北海郡開國侯加
食邑五百戶食實封如故制

敕朕即秘寢之嚴講總章之祀用鄭氏之說合祭六天

廣周家之文竝配三后禮行而孝思服誠感而瑞應通
惠我無疆之休肆于時夏之美實賴贊襄之助豈特寡
昧之能我均蕃禧理先近弼具官某志經道術性合明
誠通于古今之宜蘊茲久大之業嘗敷陳于往行預講
勸于便朝亦刺直繩俾專憲席入膺樞筦之任而四鄙
晏然進陪巖政之裁而三階穆若相予蠲潔于使劇煩
賴多聞折衷之明贊先唐經置之敏事典無闕于素齋
祓有加于精睠言陪輔之勞用疇覃施之典貳于左戶

亞為上卿參授勲階併疏井賦竝為渥異之數且旌顯相之勤往承厥休益底于道

趙槩可特授尚書右司郎中天水縣開國子加食邑五百戶制

敕朕攷我將之詩以修宗祀奏成安之曲以虔右饗祖考來格于孝天地竝貺以福因以疇覃施之典予以先拱侍之勞具官某德全于純器本乎厚有匪躬審正之操穆乃朝言有書命深淳之辭孚于邦號試以煩而竝

效視諸履而畢修出以備于行人遠自使材之美還乃
正于羣僕翊成齋輅之和佳績茂焉熙事竣已用敷純
嘏之錫以圖陟恪之勤進席都司兼衍真賦竝為褒等

如階級即云茂級
如勲即云軌級

之異益思宿業之方

張方平可特授給事中進封清河郡開國侯加食

邑五百戶制

敕夫孝莫大于嚴配禮實重于宗祀朕被飭厥典著定
其當攷成命于頌而合祭天地稽奮豫于易而參配祖

考惟神靈嘉鄉食之至蒙天人信順之助休成均貺內外
一焉矧吾名臣可稽茂典具官某學術通博體識峻明
有雅健閎深之文發揮典冊有幾微精密之用洽暢事
經彙自禁林入都憲席疇以偉望總治計文早宣濟于
本朝適倚臨于南夏教條克舉貢助甚勤屬熙事之展
成思泛恩之均被就伸向瑣之拜兼圖體國之勞勿替
而忠且欽吾賞

狄青可安遠軍節度觀察留後加食邑五百戶周

美可檢校兵部尚書耀州刺史充侍衛親軍步軍
副都指揮使耀州觀察使加食邑五百戶實封二
百戶制

敕朕攷崇祀于古行孝饗于朝三神顧謨而降康四海
駿奔而來助思與內外均穆善祥以爾青氣節毅然智
略明甚以爾美寬能馭衆勇善知方竝積用邊勞而更
制戎要留總後事將我勁兵參衛巖除譏呵行在外嘉
綏靖之效中圖拱翊之勤咸因休成第用甄表進易翰

垣之重衍食井賦之饒冠以勲名茂茲恩數往領朝賞
益勵宏圖

曹佾可檢校工部尚書鄆州刺史充天平軍節度
觀察留後加食邑五百戶實封二百戶張茂實可
檢校工部尚書處州管內觀察使加食邑五百戶
實封二百戶制

敕朕具法物之駕謁文祖之廟還即齋寢遂享大神三
祖侑焉羣元萃止委茲瑞福澤于臣工睠言綏靖之勞

宜厚休成之慶以爾佾黜閭莫二雄毅自將以爾茂實
志蹈厥忠材經于武竝曉暢軍事亦更試邊勞分提巖
下之兵參領禁中之衛或撫臨藩服以宣外禦之勤或
拱扈乘輿而濟中嚴之肅吾祀祇若爾庸茂焉用進勳
名就更閫制益昭連帥之重且旌恩禮之殊勿替忠勞
往承寵渥

李端懿可華州觀察使加食邑

案此食邑下無戶數以下文例之當

有脫李端愿可檢校工部尚書越州刺史充本州

團練使加食邑五百戶實封二百戶制

敕某等朕宅房心之野實惟明堂即太紫之廷紹修宗
祀齋明嚴配肅雍永享乃獲神靈之休亦繫師帥之助
會成熙典均泛祥釐眷言勤共宜有勞賚以爾端懿人
地標勝德器邃冲以爾端愿性資淑均志局開敏竝為
戚畹之令早承慶閔之華歷侍近嚴見稱競爽竝峻觀
風之使範咸奉列侯之內朝逮元祀之講修委親兵而
侍衛能濟中嚴之肅亦伸外禦之勞乃庸居多吾賞斯

進對易翰垣之重參升勲爵之榮滋峻等威咸服恩數
范全可檢校工部尚書解州刺史充本州防禦使
加食邑百戶王凱可檢校工部尚書隴州刺史充
本州防禦使進封太原郡開國侯加食邑五百戶
制

敕具官某等咸以武幹各總將兵積用勲勞遙分侯奄
屬涓成于元祀乃泛舉于慶恩遷領強藩衍增真賦仍
益校聯之美悉欽朝賞之華

柳植可特授尚書刑部侍郎加上柱國制

敕朕惟軒祖有明庭之祠夏后有世室之饗攷舊于古
制宜于今炳緝多儀齋明盡志蒙神靈之右饗因福嘏
之來同均霑泛恩畢周庶位矧茲近侍之舊宜先慶典
之覃具官某行本端方體資質重禁林之孚號嘗預發
揮憲席之持綱亦資糾正比賦四方之治屢上三最之
文淮海保疆土田上錯謹乃包茅之貢助茲休燎之成
峻貳秋卿參升勲等

若加階即
云勲級

竝為均施之美且旌述

職之勞往承厥恩勿懈于位

張昇可特授尚書工部侍郎加上柱國向傳式可

特授給事中制

敕周以宗祀來四海之助漢以明堂受諸神之釐朕攷
舊修饗盡志告虔祖宗孚忱神靈畀祉因以均曲施之
澤時則厚近省之臣以爾昇蔚為吏師資有賢業以爾
傳式器行居厚資術本優竝以卿材之良升于王國之
選或以奉公精力屢治邊郡之輸將或以濟物惠心迭

奉藩房之刺守江西之計已集橐關之最亦聞屬齋薦以承神竝虔恭而述職式需熙成之慶爰圖貢助之勤進貳冬官之卿入膺暮瑣之拜參加寵命優示恩章往孚于休勿懈于政

曾公亮可加柱國制

敕朕思法令之出協方俗之宜命取舊文裁定新制且究一時之便用先三日之庚乃睦侍臣領茲近局適第成書之賞特旌覃思之勞具官某體識淹通才猷敏濟

稔更文翰之職寘研法律之微彛被詔以修書能約文而從俗體我省方之至協茲下令之源閱刊定之有條在褒嘉之宜及進優勲等加示恩章

李球可內殿崇班李玘可內殿承制制

敕某等內寢之聯視諸朝秩外家之貴體自朕躬主于拜除宜在優異爾等戚畹貴種仙李真枝被長君退讓之風承鄧氏法度之教咸自修綜莫不柔嘉久從班籍之編名未稱小侯之立學宜峻近庭之秩且光左相之

賢往服寵褒益思淑慎

霍保安可樞密承旨南班賈德明可樞密承旨帶

南班小將軍制

敕某等夫樞宥惟重實總于幾微音旨所承尤資于篤
慎以爾保安材敏而濟以爾德明性謹且和竝隸幾廷
預聞密政蹈歲規而無忽習事典而有餘歲勞自陳府
奏來上差進右曹之掌兼增武弁之榮用獎恪恭益思

敦勉

馮易簡可內省內常侍制

敕某履尚謹溫資性沈密久服掖塗之祕屢當頤指之煩銜命必恭束身無過念施勞之累稔俾解籍于長秋特優內侍之名出次西聯之舊往祇褻渥勿替莊修

伊恕可御前忠佐制

敕某少壯初服果敢知名積以功勞使于宿衛暮年行及衰病日侵尚嘉宿勤差降下列仍優刺部之重亦承環衛之嚴往服寬恩勉伸餘力

吳幾復張碩賈章蔡抗竝可加騎都尉張太初可
加輕車都尉制

敕朕以四方殊俗萬事異宜將體流水之源以布巽風
之令俾爰立制亦既成書有嘉編削之勞用舉甄褒之
典具官某等雅有學尚蔚為才髦參奉詔文對刊法制
尤邃科舉之習竝通事典之經適乃物宜禋成治體已
擢升于器任仍敘進于勲聯往復茂恩益宣美業

單州團練副使范仲回可騎都尉制

敕某鄉以不修簞簞嘗坐簡書削茂秩于儲闈降副車于列郡涓成宗祀泛施曲恩宜加敘于聯勲尚勉思于往過

麥允言可景福殿使制

敕國家沿祕寢之名參置使範寵信臣之效增峻官儀矧親近而有勞在褒榮而惟允具官某才資畢給忠力自將領巖除宿衛之嚴居惟無過預叛壘討平之策時則有功爰當舍爵之初已峻廉車之重朕近乘國政之

暇因攷星緯之書惟是渾天之儀以及璇璣之法曠年
祀而不講恐日官之失傳因命討論俾爰典作匪愆厥
素適觀乃成智思引于淵微規摹造夫精密覽嘉今績
圖用舊勲益進殿塗之聯彌光貂省之任尚敦忠恪哀
對寵靈

張亢可容省使加食邑三百戶制

敕總章廢饗之已久攸司倚席而不談朕攷希闕之文
建廣大之祀先格太室還祀合宮神靈居歆天人竝貺

均布福嘏泛澤臣工具官某策名時髦授寄儒帥功名
已大資雄略以為能富貴自知蘊壯圖而有素海委制
邊之任洽聞禦侮之勞夷險弗更致為可尚屬覃朝慶
益衍戶封其在懋承勿忘式遏

向傳範可四方館使制

敕朕選卿族之良主禁閣之謁宿衛久而無過陟恪勞
而未圖會求試于藩房念積勤于軒幄思廣踐揚之美
用推委遣之恩具官某體韻詳和識業明濟早繇盛闕

之選入聯外邸之姻適賴器能擢居局禁宣詔命而惟
久練事典而克精比更衆職之煩間修二國之好專對
不撓絜矩無渝屬安世有持橐之勞而耿純興治郡之
請稍遷近職用委強藩矧方貢之是司在使聯而則重
參領符竹往賦教條勉申汝能益稱朕意

綦史宣可遙郡團練使仍舊禮賓使制

敕某別都分建軍籍實繁和壘訓齊戎國為重爰進升
于使範用分寄于武鋒以爾深厚有謀謹乎無過侍于

禁近早著宿衛之勞嬰以劇煩屢宣強敏之用羈以敷
施之地屬當靈武之衝俾領護于營兵克底綏于邊郡
更書已及陟典宜加惟全魏之帶河有離宮之管籥就
增戎秩往涖兵鈴益資更練之才式爾倚毗之志無忘
亮節益體茂恩

張岳可東染院使張僕可禮賓使制

敕具官某朕睠典戎之臣居被邊之任有勞可紀久次
未遷用均其恩差進以秩以爾岳名有武幹習知戎略

新秦介在河外委之監軍以爾僕勇且知方恩能撫士
常山臨控代郡任以護兵竝資馭衆之才咸著綏邊之
效用旌軍最爰正使聯爾勞伐之勿遺表寵臨之特出
尚圖忠力各推精誠

任守忠可宮苑使加輕車都尉宗志聰可左騏驎
使加食邑鄧保信可右騏驎使加食邑武繼隆可
皇城使加上騎都尉制

敕祀所以孚誠昭孝通神明者也朕攷宗祀于古復孝

饗于朝裒對上靈昭升尊配翕受敷錫緝熙純嘏則亦
親信之任有忠力焉以爾守忠性則謹孚材本彊濟以
爾志聰篤在誠亮敏有幹局以爾保信精明適用端粹
自持以爾繼隆習練事經休有風力竝用勞舊參試劇
煩入司宿衛之嚴預我齋祠之事乘輿所次部分有條
行在肅如拱衛顯若速成熙事亶有勤庸均穆祥釐夫
伸茂典竝優使範之陟兼從并賦之加且旌陟恪之勤
往服褒華之寵

錢晦向傳範竝可東上閣門使加上騎都尉制

敕具官某等夫德盛者流光文繁者禮緝朕昭孝宗祀
繼戎竝配具法物之駕奏成安之曲神靈咸喜天人竝
貺升燎之夕協氣薰蒸用均祥釐宜先近侍以爾晦器
用純備材資敏通以爾傳範性業淑均志慮沈邃竝為
慶闕之令參侍朱閣之華曉暢事經嫺習儀矩比膺專
對之選蔚有將命之稱交試劇煩悉昭幹裕逮九房之
講祀因千乘以闡儀周圖親信之勤委以譏呵之任行

能肅若嘉績茂焉會熙典之休成推泛恩之均施稍遷使範益進勲名用甄拱侍之榮往服褒嘉之寵

王中庸可引進使王果李中吉可東上閣門使竝加輕車都尉靳宗說可西上閣門使英州刺史李珣可東上閣門使加上騎都尉制

敕朕以季秋吉亥循復饗典纘戎祖考對越天地告虔盡備物之志委瑞有如山之崇泛推曲恩以澤庶位王中庸等或以材武膺器使或以地胄參近侍練更禁局

之要分制邊部之衝資有策謀交著聲績迨熙成之均
渥睭禦侮之有勞進增使範之華申加勲等之授往欽
慶施滋勗忠圖

曹修可東染院副使兼閤門通事舍人制

救某遮扞外虞在西州而為重宣納禁職于上閤而特
清以爾家本元勲世濟忠略關隴懷于遺愛羌戎懾其
餘威固原控邊勁兵要處爾則材武繼其家聲委以軍
符鎮茲戎壘善拊循于士伍能底靖于疆陞特寵禁闈

之名仍優染翟之介勉思靜勝之算當循武穆之為就服茂恩思濟先業

西京左藏庫副使高遵裕可依舊西京左藏庫副使兼通事舍人制

敕某惟上閤贊司之職蓋右列清要之塗非夫材稱顯聞不得兼領以爾勲門華緒內使宿名久戍邊防克奮忠毅夙圖上略嘗聞善謀守固封疆方收遠績擢預典儀之秩用增武爵之榮益思盡規以答殊寵

馬懷德可西上閣門副使制

敕某惟朱華之上閣當太微之法宮置副介之名用承
諸使慎尺一之令必取有勞乃先外禦之圖式稱至公
之選以爾俊雄韞氣沈毅有謀得牧人馭衆之方著憂
國奉公之節比更邊郡參任兵鈐卒乘講修行陣和睦
士夫懷附戎索底寧予錄乃勤命進以秩遷貳禁閣之
要尚委列城之衝職美于中恩不遺遠益圖忠槩茂對

褒章

柴貽範可閤門通事舍人制

敕某謁者之任掌賓贊受事攷功之法用宣納為最必
賴舊儀之習乃揚近職之榮以爾辭令敏修力局幹舉
再隸朱華之閤久侍赤墀之塗篤在首公勤于補過臯
圖專對之善亦嘉更練之能出講隣驩導迎使聘訖無
逋事亶有積勞特升贊于殿中往服勤于朝次勿忘勉
勵以對褒遷

李推實可閤門通事舍人制

敕某舊典通事本隸西臺近制建官則領朱閣非善音
吐有姿範者不得預于此選以爾出簪纓之後侍軒闥
之下久典贊謁十更年序彙經陪祀之慶依從升秩之
科願回霈恩稍遷近職爰念服勞之舊特推從欲之仁
益升華近之聯勿忘宣納之最併圖肅恪用對褒嘉

孫用可左藏庫副使王日宣可禮賓副使王克讓
任守素毛永保竝可內殿承制制

敕某等夫護營卒邏邊警式過外侮通為兵官稽歲勞

校軍最差進茂秩抑惟邦典爾等膺材武之選有力局
之用數更委使見稱疆敏齋伐自列應書當遷司帑別
都典客近局或從耆定之峻而承音制之重率由功次
咸用詔除尚繫拊循以底綏靖

李緯可莊宅使制

敕某夫守邊之吏若篤在首公則有國之規亦醜于用
賞以爾選自材武名有智謀嘗治軍行亦任城主能均
士卒之苦頗得夷落之和乃睠朔藩實為裔壤雖守和

戎之策尚厚宿兵之屯適委撫循自陳勞最用篤疆臣
之勸特優使範之遷今鄰好方堅邊事不聳宜修耕守
之備務先安集之方當竭爾忠何愛吾賞

郭承宗可六宅副使制

敕某承地胄之華資器能之敏參內庭之使介練近局
之事條能寡悔尤頗著風力既得處躬之善復嘉營職
之勞疇用年庸升亞使秩往服襃遷之渥勿忘臨履之

修

孫昂可宅副使制

素宋有六宅副使莊宅副使等官此宅副使上疑有脫字

敕某朕曩以右饗大神咸澤庶位覃厥休成之典擢爾副介之名仍聞守邊業有滿課詳觀闕閱之上乃在詔書之前重遺成勞申加茂秩用究臺恩之美益聯使範之華矧早負于忠圖當益躋于遠略底寧疆事取稱朕心

馮承用可供備庫使制

敕某朕以洛宅之右陵宮所安永言孝思分置官守嚴

奉歲時之薦用均霜露之懷以爾早勵恪勤存膺委使
罄一心而營護歷四稔以終更亶無尤違前有比例宜
正名于大使用率職于近廷且旌灌柏之勞當職出綸
之渥

趙滋可供備庫副使制

敕某朕以山東土俗勁悍多盜臨淄負海為一都會安
輯勞來高選時望乃今守將前吾樞臣言爾警邏彼方
肅清所部材勇可任方略甚明多翦兇渠善遇士卒嘉

聞來薦亟用賞勞度越常均超介諸使益圖自效就虔
吾恩

胡楨可供備庫副使制

敕某通班朝寢授任嶺隅屬小醜之跳梁提支兵而討
撲披堅能力獲級有勞還奉更書來援勲籍特寵使聯
之介且旌軍最之優勉竭爾思往承吾渥

盧昭度可供備庫副使制

敕某有著在庭以能任職頗立勤效實應陟科用遷副

介之聯式示褒嘉之命尚圖忠力取稱恩章

李保信可供備庫副使制

敕某預秘寢之聯視外朝之品比資武幹適委邏兵能
謹視于寇偷頗肅清于鄉部通稽宿課參叙今勞擢居
使介之聯就壯軍行之領尚圖忠力懋對恩章

劉允濟可供備庫副使制

敕某睠彼關南控于塞下重兵留戍夾河置防爾早以
幹資給吾煩使伺軍中之動靜覘疆外之幾微比及終

更多得要領擢升副介之列且旌馳奏之勞

張德志可供備庫副使制

敕某蹈謹畏之風進承中制資強濟之力參服外勞聿
修無愆所至有迹屬計年之課吏且齋伐以應書擢升
使介之聯庸示朝恩之茂益圖勤蓋以對褒嘉

許咸亨可供備庫副使制

敕某籍在殿塗是承中制任居邊部式過外虞善拊循
于士兵煩宣著于材力修上最凡之目合于旌陟之科

宜寵副聯往亞諸使尚謹將屯之重勿忘繼武之和

全克懃可供備庫副使制

敕某敏頗有材謹且能力中承軒闈之制外護州藩之
兵參叙積勤亶無逋事宜疇吏課之最用優使介之聯
就服褒嘉益圖勤蓋

王文顯可供備庫副使制

敕某通籍文陞假守姚墟以風矩之修資力局之幹德
行頗舉士兵兼懷上計有司應我攷法寵內庭諸使之

副獎外屏守臣之良就服臺恩勉思藩政

錢師回可供備庫副使制

敕某職承內制身服外勞邈居江鬱之潯近按島夷之悍長茲遠服撫我列城能和殊俗之心弗啟吾民之患宜疇賞格入副使聯尚惟忠力之圖虔茲恩典之茂

江從可供備庫副使制

敕某性質專良力局幹舉給吾左右之事涉于禁輿之塗沈密罕言端修寡過宣傳中制稔服內聯凝集成勞

參應陟典俾升諸使之亞且承劇務之煩勿忘欽祗益

圖云補

李允恭林宗普竝可供備庫副使制

敕某等開敏自將謹孚有裕竝資器幹之利參試材使
之煩藉漢省珥貂之華涖周官司甲之職局事修舉績
善著明特正供擬之使聯咸參副介之朝秩且賴宿官
之久宜從增秩之留往服褒恩益圖來裕

李琦可供備庫副使李瑊李琚李球竝可內殿承

制制

敕某等朕以浚泉在詠懷聖氏之慈渭水興嗟增逝者之感眷言諸息洽被遺恩以爾等妙年自修沖規可尚參從貴里分籍禁庭惟蓼莪之在憂服苴麻而居制或聞摧慕良足哀矜覽遺表以泣然稽舊章而允若擢升使介進陟班聯恩乃究于外家義勿慚于前代勉思樹立姑務顯揚

周應可西京八作使制

敕某首列太醫參領儲使仍典水衡之職兼司都苑之
嚴必葺有勞乃為可紀閱監司之薦狀務開勸以推恩
特超叙于崇資往欽祗于茂典

文恭集卷十七

欽定四庫全書

文恭集卷十八

宋 胡宿 撰

外制

張昇可兵部員外郎充天章閣待制環慶路都部
署經略安撫等使兼知慶州制

敕朕選通經術有行義之士訪對制閣參典秘圖置在
內朝之聯本惟儒者之職間咨策略分寄翰垣亦服采

于禁嚴且推恩于臨遣我收文武之用往制羌胡之衝
乃獲能臣爰敷茂典具官某有史魚之直稱壺遂之賢
稔聞忠規嘗置罔錯端心向國處鯁議而弗回正色立
朝臨至剛而不吐屬西川之闕帥惟安化之控邊言念
戎翰之良無踰書殿之舊進參持橐寵升屬車臨長列
藩表率本道噫左右薦替內外屏毗委仗則均安集攸
賴書不云乎爾身在外乃心罔不在王室寬我西顧勉
而求忠

劉沆可依前給事中充龍圖閣學士知開封府制
敕前世尹正之才難于三輔本朝都府之政刑諸四方
我得吏師寄之京劇宜峻圖書之職往裁輦轂之煩具
官某風業俊雄體識明遠早代言于掖省常賦政于藩
方文采潤色而有餘經術飾事而不惑委靈刑之審克
多中典之平反咨乃讞疑副予欽恤試公才之敏百鍊
不銷考績用之期一閔已效睠惟浩穰之地實資強濟
之能剖析煩拏推行靡密自近庭而選衆繇內閣以升

名往司獄市之繁善體教條之意使枉直有寄苛慝不興嘉竚治功以光表則

錢明逸可依前兵部員外郎充龍圖閣學士知蔡

州制

敕京輦之政誠處劇煩犴獄之情所當審克既失防閑之理宜從罷免之科具官某雅稱偉才早奉大對入典明命作為訓辭擢預禁林之游委司都府之治失于馭吏淹乃繫囚久違弊斷之期不勝楚掠之苦以至踣斃

良用哀恫而又日者庸狡之人構造詐諉之策冀望非
福震驚朕師雖已正于刑書猶未安于朝議其上尹政
且領守符仍優內閣之除兼委近藩之便尚圖敏政勿
替來忠

劉沆可龍圖閣學士給事中知永興府制

敕朕以內閣圖書之職資儒術行業充備其選全雍戎
馬之地用文武器幹倚以為重既獲敷求之志宜有臨
遣之恩姑示睠懷且旌圖任以爾具官某才具明決知

識周通自振藻于皇塗實有聲于當世作我明命著訓
暢于西臺敷厥教條勤撫綏于南夏能去山林之蕞善
得江漢之心比奉更書還參從蹕委近司之審克多中
典之平反刑讞靡留朝言惟穆會長安之闕帥方四顧
以須才僉曰汝賢協于朕意左右獻納雖志力之是圖
內外屏毗在藩朝之均重爰申茂典益進榮名用煩俊
哲之行參付德刑之計噫重兵所部雜谷攸居雖方略
素明無煩于多訓而剛柔參濟勉務于適中往服茲猷

勉成遠用

左中奉大夫權尚書吏部侍郎兼史館修撰周館
除集英殿修撰知温州制

敕近臣勇退洊控于忱言王者閔勞俯從于雅志矐惟
者艾宜錫恩輝具官某學術醇深行能高妙登車攬轡
徧更外服之華拖玉飛綵晚上禁塗之峻銓綜著天官
之效編摩光金匱之藏方隆尚齒之時遽有由衷之請
老成是賴申諭莫回升麗正之崇資畀永嘉之名郡以

優者德以示殊私尚勉建于風聲即還躋于次對

右侍禁折繼祖可西染院使知福州制

敕其官某爾世蹈忠圖族雄邊部率和種落懷附朝家
嚮茲伯氏之良承濟前人之業過磧中之外警委河上
之列城方倚拊循遽嗟殞缺覽疆臣之條奏逮部衆之
控祈謂爾武幹尤長純誠可任習知戎馬之事能識羌
夷之情宜襲舊勳式俞來請伸部符之朝獎進染翟之
使聯恩典有崇名秩其慎當善遇于吾衆務謹守于先

規

李昭述可依前刑部侍郎充龍圖閣學士秦鳳路
馬步軍副都部署兼知秦州制

敕二閣峙于內職在圖書六郡被于邊任居戎馬矧隴
西之尚武惟天水之稱雄謀諸師臣得于雋望適倚鎮
綏之略宜推臨遣之恩具官某盛德名門偉才良器該
典文而多洽資志識而周通居然敏猷應乃郡務幾廷
進直得安世慎密之風北道倚臨有翁歸文武之用塞

垣以肅年閏比更試乃秦中濱茲河外撫羌戎之雜種
制汧隴之勁兵牧人其難選衆斯屬用寬西顧之睭具
急盛秋之防兼疇制閫之勤庸益進秘圖之禁職憑賴
所寄內外則均勉從易壞之行嘉佇幹方之最其聽朕
命不忘爾勞

劉巽可主客員外郎知濟州仍賜紫制

敕某究明經義初預銓集之流通曉吏文遂膺宰旅之
選領校五曹之事慎持三省之方能寡悔尤頗精比例

寢升朝次屢易歲陰用圖風力之勞出寄符書之守仍
進握蘭之秩復班染炭之章臨長吏民宣錄條教勉而
善政虔我渥恩

李珣可文州刺史制

敕朕考經術之文見春秋之法推親親以貴母黨因善
善而及宗支況我外親殞夫元舅痛享年之不永撫遺
札以增歎俾加惠于孤煢示敦仁于戚屬具官某柔恭
克孝通敏且材侍子舍而無違出后家而有裕早任天

闕之要誠為戚畹之良險釁所鍾哀推在疚尋推恩之
有自在進秩以攸宜已陞右閣之華兼刺列城之重慰
其孝嗣思乃前人式究哀榮勉思法訓

趙良弼自豐州刺史除撫州刺史制

敕師賓之列素用正人牧守之任必求良吏具官某資
于忠信文之禮樂言詞詳雅器識洪通令問徽猷搢紳
推重南宮起草事著于彌綸東吳授鉞功存于制勝中
外之政終始不渝爰自休閒尤彰操尚官垣選美俾參

調護之職方鎮藉能式委分憂之寄

劉永年可寧州刺史制

敕某夫刺史古之方伯為國爪牙任千里之尊秉一州之率威懷所寄擢敘尤艱以爾胄緒本華才資兼茂謹乎匪懈敏濟有聞歷內庭諸使之聯申列部鈐兵之委載環歲序參敘宿勤特升刺部之名尚寄典土之任廩給優厚朝渥便蕃勿忘俯偃之恭更圖臨履之效

張惟吉可果州刺史制

敕謹質者朕所倚愛澹退者人之難能況夫參珥左璫
列侍中省久居親信之任弗矜委使之勞宜舉褒章且
旌冲範具官某忠純有守謙約自持侍帷幄之起居常
勤陟恪慎樞機之周密能絕悔尤比資強敏之材屢任
劇繁之職曾驅馳之不憚在俯偃而益恭未嘗求官且
不遺力安和備于諸事恬晦簡于朕心是用申敘積勤
褒遷茂秩領劇部團兵之重增昆臺近侍之榮名數有
加寵靈特出勿替謹孚之志益昭毗倚之懷

郭元又可忠州刺史陳拱可昌州刺史制

敕某等內統禁局參領列藩所以昭使範之華重戎翰
之寄用甄勞最式示褒遷以爾元又材武是經智謀在
任以爾拱迪知忠果服在勇方竝高諸使之聯分委護
兵之任絕甘有素馭衆適宜代北以清嶠南且肅嘉訓
齊之輯睦逮控遏之底寧并升使竹之名參壯和門之
重就虔褒典勿替忠圖

邢王孫宗望可遙郡刺史制

敕某朕篤在展親樂聞為善用進州藩之秩且旌宗邸
之能思出褒優義存開勸以爾本支秀發環衛參居滋
承信厚之風雅厭紛華之習慕前良之楷法試累牘之
柔毫獻狀公車留觀天帳迴臻體骨之媚深嘉芝墨之
工特升刺部之名用獎臨池之學勿忘美志更懋令猷

張中庸可開封府判官制

敕某漢制以御史監三輔不法復有按章覆問之選至
于忠文柱下皆獄法之冠也不止于彈治而已今都畿

尹政之劇獄市姦人之淵隱偽干憲屬之良吏以爾治劇有餘審固不撓資其抑欲之利與夫照姦之明往裁諸煩善輔于尹

劉能可御前忠佐馬步軍副都領依前合州刺史

制

敕某勾陳之衛參護宸嚴尺一之遷舉循功次以爾奮
繇行伍通知勇方頗積勤庸遂有高爵遙刺州部近拱
巖除宜升環列之名益佇樸忠之效勿忘勵節以答推

恩

譚嘉震可依舊內園使昭州刺史制

敕內司苑監遙制蕃職所以壯爪牙之選重襟喉之寄矧幹方之惟舊且扞邊之有勞屬申委于兵鈐宜兼榮于使竹具官某本惟將種少有驍名好慷慨以論兵加深沈而多算游領偏裨之任數當外禦之鋒疆堠無侵軼之虞軍行有輯睦之整乃睠安化適控西戎尤急盛秋之防特倚勁兵之處寵升刺部雄示專城勉踵世勲

益圖軍最

王興可陵州團練使傅永吉可開州刺史益元可

普州刺史蔣偕可忠州刺史制

敕某等夫舉不失功則勞臣知勸賞不遺外則主恩下
究朕閱邊吏之瑣因見疆臣之名其間久踐戎行屢當
寇禦功名著而甚白爵秩鬱而未遷用振滯淹特申甄
拔以爾興資韞材武濟以樸忠以爾永吉嘗摧姦鋒名
有勇決以爾元氣質沈毅部分精明以爾偕文武自將

功名已任竝曉知疆事而達練戎韜彘賴扞城之雄比
居控塞之任種落畏伏亭障底寧今參委戎鈐復分制
藩任軍陣輯睦士伍綏懷稽用舊勞申加褒典進領團
兵之重參升刺部之名出于朕心旌爾邊最各思自效
勿替曩圖

石全彬可陵州團練使制

敕某朕寵厚武材竝建使範乃眷軍團之峻尤為戎翰
之榮方寄外虞式頒成渥以爾操修無缺幹裕有聞以

謹乎之資早服勞于官省以敏洽之用久宣力于邊關
眷雍部之控戎惟匈奴之被塞允號勁兵之處尤艱禦
衆之材資乃練更委之鈐護仍進訓齊之秩用旌臨履
之勞往服茂恩善撫吾衆

劉永世可果州刺史充本州團練使制

敕朕慎名器之分懋官賞之宜差次功能擢敘武爵既
篤先勞之勸兼圖久次之勤用遷滯留宜伸甄拔以爾
承胄緒之舊資性質之良遙分竹使之符近總琳房之

職習事經而無缺奉朝請而有度閱官簿而則深覽需章而乃實爰紀恪恭之節用升團練之名尚涖威神之庭往欽使部之寵益思慎履當體殊恩

王從善可西京左藏庫使依前充果州團練使制敕某洛師之重分置于官儀禁帑之名差優于使範用甄往效特懋茲恩以爾勲閎緒餘近庭陟恪蹈世忠而濟美服王務以宣勞勲者資素性之謹良委禁垣之提警雖宿衛無狀俾出領于兵鈐而疇昔有勞用稍遷于

使局示舊勤之匪棄尚褒典之是承

余靖可左神武大將軍遙郡刺史州鈐轄差遣制
敕某陟罰之典竝體于至公甄敘之恩用圖于曩效張
敞起于亡命安國擢于徒中資以前勤抑惟往制以爾
博于古學濟以敏文自致秀科優入制等常游冊府之
祕邁升辭禁之華煩使有材首公能力曩因往咎中見
謫居越在南服之荒多歷徂年之所尚分留籍已進亞
卿朕以爾久侍近班三使絕域念勞可錄在宥弗忘擢

居環衛之嚴遙刺列城之重無以名器之小異當問才略之何如起圖而忠往服朕命就司鈐護當體敘收

李瑋可起復雲麾將軍保州團練使制

敕朕感先慈早棄長世眷乃元舅適及外家享命弗融遺恩宜厚具官某義方被教退讓陶風稟韶令以兼資處紛華而匪雜彛膺選尚方俾進修屬邁親喪例推權制用正軍團之秩兼升環衛之名式慰孝思俾參朝請庶幾進見特示眷懷勉遵肯構之規宜亮奪哀之意

溪洞新州知州彭師政富州知州彭師晡竝可銀
酒監武知本州軍州事制

敕某等越在辰溪欽我朝化善固封守多歷歲年有嘉
成勞且敘前化崇階美秩勲等憲聯竝命詔除益圖忠
效

溪洞寧州知州彭師鴈可銀酒監武知寧州制

敕某能慕聲明善固封守附陳前比求敘上恩嘉其輸
附之誠伸以褒優之命崇階茂秩華紱命章併示寵綬

益圖欣戴

曹正可袁州司馬制

敕某爾幹局無缺第課當遷具有奏封乞從歸老聽解
算商之任為除司武之名往服優恩俾從素志

追官勒停人屯田員外郎蕭禋可萊州別駕制

敕某籍通省郎班在朝序簡書罔畏簞簋不修詐諛受
賕鞠問得狀所坐狼籍談者誼譁宜正刑書奪去官秩
與之上介猶曰寬息

解賓王可開封府判官問詢可開封府推官制

敕某等古者京兆比三輔為劇今之都府亦萬事所叢
必簡乃僚協相厥務以爾賓王儒者之風志行修潔臺
觀討論之職京輦煩拏之任稽諸行事已試之效孔明
以爾詢髦士之良才本強濟緣中司薄罪之坐歷外屏
左官之遷長于治民可紀之績甚白或就甄最狀升冠
元僚或還錄敏資佐治煩局噫郵罰麗于事察獄必以
情勉思是言勿懈于位

高良夫可依前主客員外郎充開封府判官石揚
休可太常博士兼秘閣校理充開封府推官制

敕某等朕高選時望擢典京司妙簡才髦參備僚屬以
爾良夫習于為吏治有能名以爾揚休才堪決煩文甚
爾雅或嘗操外憲之柄或久預中秘之游稽慰薦而有
先試浩繁而已效是宜參濟京劇輔佐尹賢爾其察人
寃謹吏黠慎要囚之伏念體庶獄之哀矜務竭乃心以
稱朕意

范純熙可鄧州節度推官制

敕某習知吏事領佩縣章本于惠心善撫黔細沛有餘
力能制寇偷支黨悉除鄉亭絕警州上勞迹臺舉賞科
擢亞元僚之游且旌健令之最

凌起可昭化軍節度推官制

敕某本造士之良膺字人之寄越在嶺服肅治邑封尤
旌方略之施多有寇攘之獲閱計臺之言狀覆憲部而
中科擢參賓謀申示朝賞

解賓王可開封府推官制

敕某中畿尹政之繁總司都輔先朝景德之制增至屬僚參聽庶獄之辭分裁一府之任用釐浩劇必選幹能以爾學力淹通性資純固預儒館討論之任更曲臺贊相之儀用先行實之圖且膺政務之試強敏者乃其有濟安舒者戒于後時往承上官勉修爾職

鄆唐可懷州防禦推官張式可賓州軍事推官制
敕某等往者職在詰盜資入督郵能修尉察之方善屬

追胥之力寇偷就獲墟落底寧覽嘉勤吏之能超用有
司之格擢從州簿參預賓籌往祇從事之榮勿替首公
之敏

許震可試大理評事充威武軍節度推官制

敕具官某循吏之子清白承遺緣蔭格而隨牒階詔舉
以字民所守廉平素行修整代還有應書之最次補以
入幕之僚尚寄弦歌勉績功次滿課之上則有前詔

張伯通可試大理評事充奉寧軍節度推官制

敕具官某朕用天聖詔書選舉令宰賞格條目端委詳
陳所以為官擇人廣施德于天下比聞撫字多獲善良
齋伐之來恩典奚啻吞爾以蔭籍階仕版以薦任佩縣章
滿秩有功在法當陟宜參入幕之畫尚寄鳴弦之治往
欽無忽汜濟有成尚佇來勤乃終後慶

李益可試大理評事充徐州觀察推官制

敕具官某任居宰字介在邊隅歲惡無聊民起為盜能
施設于方略悉擒送于根株縣部底寧臺格應賞乃睽

彭門之劇俾參幕府之籌用錄前勤尚圖來效

劉義叟可試秘校呂夏卿可試秘校充石州軍事
推官餘如故制

敕某等奮自髦彥名有學術義叟早膺詔舉獻策開邊
夏卿擢自賓興以文入彀或試員于列寺或隨牒于遠
方會置局以修書俾和鉛而參職觀所舉者咸吾近臣
稔聞約史之勞加有奉祠之恪熙成均慶典領為言用
升賓幕之資對服書筵之舊姑為漸陸勉濟成編

張子庚可殿中丞依舊知縣制

敕具官某夫春秋之法先內而後外繇近以及遠爾早
籍穀中之雋適治窠內之邑持心近厚從政弗苛條上
年庸協應賞格進丞盾省之局參預朝著之聯于以風
激四方開勸勤吏此亦先京師後諸夏之義也其懋承
之哉

劉槩可試大理評事充忠武將軍節度推官知邢
州堯山縣制

敕具官某爾擢奉臺詔治茲邑氓能體勤約之風善賦
惠和之政終更無缺旌陟有條宜升幕府之游尚寄縣
同之任勉修前績姑俟後恩

前守鄜州洛川縣令宋太可試大理評事充天平
軍節度推官知潞州壺關縣事制

敕某以敏給之才推擇為令在職稱辨于法當遷列于
賓席之聯付以縣章之寄益圖善治以漸榮階

張徽可試大理評事充節度推官知夔州奉節縣

制

敕具官某以軍從事之職任邑大夫之政秩滿官下代
還邊隅較課中銓升榮大幕尚寄弦歌之治勿忘簞簋
之修有佇來勤以須後陟

高汝士可山南西道節度推官知瀘川縣韓澤可
山南東道節度推官知廣安軍新明縣制

敕某等縣大夫之職去民最親朕用天聖詔書拔舉清
吏付以銅墨寄以弦歌似聞元元頗受其賜脫有異績

何愛陟恩爾等名在選中治成官下終更齋伐鈎校應
書稍升幕府之游重煩美錦之製勉卒前課具如賞條
郭旦可依前祕校知單州成武縣公遜迪可試祕
校知齊州歷城縣馬居方可試祕校知濮州臨濮

縣制

敕某等邑大夫之任以寄赤子之命非有臨履善最監
司薦延朕未嘗輕授銅墨爾等居尉察之職有追胥之
勞翦除盜姦肅清鄉部本郡言狀有司覆實在勤可紀

于法得遷竝試守一同臨長百里有民有社良足為政
既能屏去苛慝便當存撫細弱脫有善迹何愛存官往
正爾心使稱朕意

李舉賢可洛州曲周縣令制

敕某以法學之明縻我爵秩以吏資之習服我尉員方
略甚明寇攘多獲有司言狀賞格應遷嘉其敏才擢以
健令勉樹庇民之績且旌詰盜之能

呂用賢可磁州邯鄲縣令制

敕某勾稽名官承乏比邑檢簿書之謬絕有毫差督寇
偷之姦悉能株送鄉亭肅又民堵安安所部條聞厥勞
炳著宜示賞科之信俾要健令之章往服褒遷益圖員

補

成吉甫可趙州隆平縣令制

敕某中經生之科隨大選之牒守尉百里詰盜四封盡
得主名多獲支黨留司上其最狀憲部議其賞條宜升
佩于縣章用勸登于吏力就虔褒寵勉務清修

申陟可相州湯陰縣令李任可兗州瑕丘縣令制
敕某等名居尉察職在追胥任百里之佐員詰四封之
姦盜根株多獲閱條聞宜旌印綬之榮擢布弦歌之
政用優力幹且信賞條務濟惠和往綏細弱

王昭可濮州臨濮縣令制

敕某鄉居尉察嘗前冠攘尋稽臺賞之條已結縣同之
綬綸函未拜直制乃嬰適御祥琴追申前詔用復弦歌
之治益思簞簞之修

趙貺可相州永和縣令制

敕某調補都銓追胥劇邑善知姦穴之隱悉得王者之名株送甚多邑居以肅監司言狀參覆應書宜從健令之遷且賞詰姦之效益圖撫字無替操修

宋康濟可青州益都縣尉制

敕某本繇襄博嘗舉蹶張預禽寇偷遂有班籍厭走一封之傳求換半通之綸俾領追胥且從志尚當善恤于民隱務祇守于官箴

种世衡男古可鳳翔府天興縣尉制

敕某男某爾父鄉以將材官吾邊部著首公砥節之效
有典戎幹方之能適倚扞城不幸早世覽觀爾奏論列
父功因命憲司攷驗實狀事雖存于端緒辭有涉于詐
諛尚念前人舊著勤績為寬法律之坐俾司簿書之稽
當體寬優勿忘甄錄

白舜元可莫州長豐縣尉制

敕某名書班籍年在東隅厭乘輅車願仕郡邑亦以餘

力庶幾學文俾除尉察之員尚謹追胥之職勿渝美志
茲懋來勤

敕賜五經及第孫師旅可鄆州須城縣尉制

敕某鄉以經中美科預選便殿今以年合常格得集中
銓可以試吏服官詰姦禁盜無替而學尚慎厥初謹視
寇偷善遇黔細

敕賜毛詩及第王仲甫可光化軍乾德縣尉制

敕具官某爾鄉用專門之學當中揚庭之科會失節宣

謝去唱注今疴恙良已而名錄具存銓部以聞尉察為
擬當慎服官之始勿忘絜矩之修謹視寇偷務恤黠細
李從政可秀州嘉興縣尉制

敕某鄉者自廷尉史除民曹掾銓資甫入書局端留會
刊定之奏篇用追胥而改秩且甄恪效益守廉規

史館孔目官汪宗益可青州壽光縣尉制

敕某經署版曹留寘史觀肆勤匪怠習事寡尤質選格
而已盈稽恩比而當補外邊尉察往務勉修

尚書學究及第陳元良可永康軍司法制

敕某爾擲者經明得科齒幼未祿今緇布已冠而舊學
尤通可以入官使之從政往司三尺之律初有半通之
綸善持丹書務遵素履

蘇澄可權蔡州支使制

敕某朕以震誕在辰賞延均渥惟吾政弼之舊來上公
車之章言爾早預親聯冀霑朝寵宜自勾稽之局權居
參畫之筵尚慎聿修無忝內舉

黃東可成州同谷縣主簿制

敕某蜀郡學者等鄒魯焉爾經藝淹通喜為諸生之誦
說士矩修飾往被大臣之薦延試秩蘭臺授經石室雖
仕版有所齒而稟祿未及賦乃今州將之重即吾書殿
之望再形論奏益堪取信就補勾稽之秩勉思教道之
方宜本先儒以正後學

孟永寧可新州新興縣主簿充翰林待詔御書院
祇候制

敕某恪奉嚴宸頗精楷法籍禁門而惟舊成寶刻而有
勞特疏一命之榮且獎六書之善益專小學往服茂恩
御前學究及第李奎可河南府澠池縣主簿制
敕某齒未及冠經已中科羈令待年今乃應格成宵雅
肆三之志服初命半通之綸無忘愛民其益修已

曹宗壽可磁州昭德縣主簿劉復可陳州西華縣
主簿制

敕某等本縫掖之家紆使者之紱藝文略涉志局方剛

不樂乘輅之馳來求訟牒之補為除班籍聽入銓流分
勾簿書之稽尚勉箕裘之習

進納梢草空名助教制

敕某日者河流弛于故道比詔都水議塞決隄爾能輸
下捷之材案史記下淇園之竹以為捷原本捷訛捷今改正以助有司之費用

補州藩之佐且為邑里之榮

高永可試助教制

敕某爾嘗以藥石事于宗藩試諸方書頗知倫脊命學

庠而試秩去選籍之入流往服榮名益思謹力

在京進納斛斗楚州等第戶房旺可將仕郎守本

州助教制

敕某等金布甲令共給邊費至于入粟補吏皆漢法也
以爾本編戶之細擅居室之饒能捐我私以佐公上俾
崇鄉里之化往服朝家之恩褒勸在茲祇受無忽

成有宗可河中府司錄叅軍監汀州鍾賽金銅場

制

全史卷之八十一
卷十八
敕某比沿銓牒經佩縣章亦既終更適從調集以州網
之列掾莅金冶之別司往服爾勞用圖來賞

明法及第廉正臣可陝州靈寶縣主簿段林可霸
州司法參軍制

敕某等本治臯蘇之律或通鄒魯之經對升科榮各在
年妙今鈐格既及則官使自宜往勾邑簿之稽參司邊
掾之任勉思乃職勿替攸箴

張永德可衢州常山縣尉兼主簿制

敕某以籍在行人名參上介度于秉事號為寡尤愍其
歷紀之勞寵以莅官之命往司尉察勿忘廉規

薛安期可益州司戶制


敕某隸在公府主發詔函執勤累年賞勞有典授以路
藩之掾寵茲民版之名用示優恩尚仍舊局

學士院驅使官羅整可梓州司戶參軍依舊供職
制

敕某隸屬嚴局服從煩使在事條而頗習奉頤指而有

勞來援舊規宜有初籍俾預銓流之補且從禁苑之留
新及第進士諸科李育等可幕職州縣官制

敕新及第進士李育等朕自纂御以來規恢治道右文
崇術扶進學者育材養器登備時使親加較試多所成
就烝然髦士參照內外勸導之意可謂至矣爾等竝因
詔舉相與計偕有司籍名便坐臨試既第其辭等復差
以爵秩爾其念進官之始思臨履之難善持官箴無忽
民事咸自修綜取稱吾恩



文恭集卷十八